

Na osnovu člana 16. stav 1. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj:7/10) i člana 30. Zakona o plaćama i naknadama policijskih službenika Zeničko-dobojskog kantona („Službene novine Zeničko-dobojskog kantona“, broj: 13/17), na prijedlog Ministarstva unutrašnjih poslova, Vlada Zeničko-dobojskog kantona na 150.sjednici održanoj dana 05.07.2018. godine, d o n o s i

U R E D B U

O USLOVIMA, KRITERIJIMA I NAČINU OSTVARIVANJA NAKNADA I DRUGIH MATERIJALNIH PRAVA POLICIJSKIH SLUŽBENIKA ZENIČKO-DOBOJSKOG KANTONA

DIO PRVI - OSNOVNE ODREDBE

Član 1.

(Predmet Uredbe)

Ovom Uredbom uređuju se uslovi, kriteriji i način ostvarivanja prava na naknade i dodatke na plaću, kao i druga materijalna prava policijskih službenika Ministarstva unutrašnjih poslova Zeničko-dobojskog kantona (u daljem tekstu: policijski službenik).

Član 2.

(Naknade i dodaci na plaću)

Naknade i dodaci na plaću policijskim službenicima propisani su Zakonom o plaćama i naknadama policijskih službenika Zeničko-dobojskog kantona („Službene novine Zeničko-dobojskog kantona“, broj:13/17) (u daljem tekstu: Zakon).

DIO DRUGI - NAKNADE I DODACI NA PLAĆU

Član 3.

(Vrste naknada i materijalnih prava)

Policijski službenik ima pravo, u skladu sa Zakonom, na sljedeće naknade i materijalna prava:

- a) naknada zbog privremene spriječenosti za rad;
- b) naknada za porodiljski dopust;
- c) naknada za slučaj teške bolesti i invalidnosti;
- d) naknada za prekovremeni rad, rad u neradne dane, noćni rad, rad u dane sedmičnog odmora i rad u dane državnih praznika;
- e) naknada za privremeni interni premještaj;
- f) otpremnina u slučaju otpusta zbog viška policijskih službenika;
- g) naknada za troškove sahrane i za slučaj smrti;
- h) pravo na osiguranje od posljedica nesretnog slučaja;
- i) naknada za prevoz na posao i sa posla;
- j) naknada za ishranu tokom rada (topli obrok);
- k) naknada za korištenje godišnjeg odmora (regres);
- l) naknada prilikom odlaska u penziju (otpremnina);
- m) naknada za službeni put;
- n) naknada za odvojeni život od porodice i smještaj u mjestu rada;
- o) druge naknade utvrđene Kolektivnim ugovorom za policijske službenike.

Član 4.

(Vrste dodataka na plaću)

Policijski službenik ima pravo, u skladu sa Zakonom, na sljedeće dodatke na plaću:

- a) poseban dodatak na plaću;
- b) dodatak za izvanredne radne rezultate.

DIO TREĆI - NAČIN OSTVARIVANJA NAKNADA

Član 5.

(Naknada zbog privremene spriječenosti za rad)

(1) Naknadu plaće zbog privremene spriječenosti za rad policijski službenik ostvaruje u skladu sa članom 14. Zakona.

(2) Policijski službenik je dužan da za svaki prethodni mjesec dostavi izvještaj o trajanju privremene spriječenosti za rad (bolovanja) te ocjenu radne sposobnosti, nadležnoj organizacionoj jedinici.

(3) Organizacione jedinice su dužne uz šiftnu listu, u kojoj je evidentiran broj sati provedenih na bolovanju, radi obračuna plaće, priložiti originalni izvještaj o trajanju privremene spriječenosti za rad, te ocjenu radne sposobnosti.

Član 6.

(Naknada za porodijski dopust)

(1) Naknadu plaće za porodijski dopust policijski službenik ostvaruje u skladu sa članom 15. Zakona.

(2) Ministarstvo će policijskom službeniku koji je na porodijskom dopustu isplatiti razliku do visine njegove pune plaće.

(3) Za vrijeme trajanja porodijskog dopusta naknadu razlike plaće policijski službenik ostvaruje na način propisan članom 5. ove Uredbe, uz podnošenje pismenog zahtjeva sa priloženim rješenjem nadležnog centra za socijalni rad kojim je utvrđeno pravo na naknadu plaće za vrijeme porodijskog odsustva.

(4) U slučaju prekida korištenja porodijskog odsustva policijski službenik dužan je pismeno obavijestiti Ministarstvo i dostaviti rješenje nadležnog centra za socijalni rad kojim je utvrđen prestanak prava na naknadu plaće.

Član 7.

(Naknada za slučaj teške bolesti i invalidnosti)

(1) Policijski službenik ima pravo na jednokratnu novčanu naknadu za slučaj nastanka teške bolesti ili nastanka invalidnosti u visini dvije prosječne neto plaće isplaćene u Federaciji Bosne i Hercegovine prema posljednjem objavljenom statističkom podatku.

(2) Policijski službenik ima pravo na jednokratnu novčanu naknadu za slučaj nastanka teške bolesti ili nastanka invalidnosti člana njegove uže porodice u visini iz stava (1) ovog člana.

(3) Članom uže porodice policijskog službenika, u smislu ovog člana smatraju se:

- a) bračni i vanbračni drug ako žive u zajedničkom domaćinstvu sa policijskim službenikom,
- b) dijete (bračno, vanbračno, usvojeno, pastorče i dijete bez roditelja uzeto na izdržavanje) do 18., odnosno do 26. godine života ako se nalazi na redovnom školovanju i nije u radnom odnosu, a dijete nesposobno za rad bez obzira na godine života,
- c) roditelji (otac, majka, očuh, maćeha i usvojitelji) ako žive u zajedničkom domaćinstvu sa policijskim službenikom,
- d) braća i sestre bez roditelja do 18., odnosno do 26. godine života ako se nalaze na redovnom školovanju i nemaju drugih prihoda, već ih policijski službenik stvarno izdržava ili je obaveza njihovog izdržavanja zakonom utvrđena, a ako su nesposobni za rad, bez obzira na dob, pod uvjetom da sa njima živi u zajedničkom domaćinstvu, i
- e) unučad ako nemaju roditelja i žive u zajedničkom domaćinstvu sa policijskim službenikom.

(4) Pod teškom bolešću iz stava (1) i (2) ovog člana podrazumijevaju se sljedeće bolesti: akutna tuberkuloza, maligna oboljenja, endemska nefropatija, hirurška intervencija na srcu i mozgu,

sve vrste denegerativnih oboljenja centralnog nervnog sistema, infarkt (srčani i moždani), oboljenje mišićnog sistema, paraliza i druge teške bolesti određene općim aktom Federalnog Ministarstva zdravstva.

(5) Pravo na jednokratnu novčanu naknadu po osnovu nastanka invalidnosti iz stava (1) i (2) ovog člana, ostvaruje se za utvrđeni stepen invalidnosti od najmanje 60%.

(6) Pravo na jednokratnu novčanu naknadu ostvaruje se podnošenjem pismenog zahtjeva policijskog službenika u roku od šest mjeseci od dana nastanka teške bolesti ili invalidnosti.

(7) Zahtjev za ostvarivanje prava na jednokratnu novčanu naknadu iz stava (1) i (2) ovog člana treba da sadrži osnov po kojem se naknada traži i naznaku da li se naknada traži za policijskog službenika ili člana uže porodice.

(8) Uz zahtjev se prilaže:

- a) ovjerene fotokopije medicinske dokumentacije sa utvrđenom dijagnozom bolesti, ili akta nadležnog organa o utvrđenoj invalidnosti ako se zahtjev podnosi po osnovu nastanka invalidnosti;
- b) dokaz o svojstvu člana uže porodice;
- c) dokaz o zajedničkom domaćinstvu u slučaju iz stava (3) tačka a), c), d) i e) ovog člana (kod nadležnog organa ovjerena izjava o zajedničkom domaćinstvu - kućna lista;
- d) dokaz o prebivalištu - obrazac PBA-3 za policijskog službenika i za člana uže porodice za kojeg se traži naknada, u slučaju iz stava (3) tačka a), c), d) i e) ovog člana;
- e) izjava policijskog službenika ovjerena kod nadležnog organa da po istom osnovu (ista teška bolest ili invalidnost) nije ostvario pravo na novčanu naknadu;

(9) Radi pribavljanja stručnog mišljenja u pogledu postojanja i datuma nastanka teške bolesti, Ministarstvo će ovlaštenoj zdravstvenoj ustanovi dostaviti medicinsku dokumentaciju koju policijski službenik priloži uz zahtjev.

(10) Dokumentacija kojom se dokazuje teška bolest ili invalidnost policijskog službenika ili člana njegove uže porodice ne smije biti starija od 6 (šest) mjeseci.

(11) Po pribavljenom mišljenju iz stava (9) ovog člana i uzimajući u obzir ostale dokaze i uslove propisane ovim članom, Ministarstvo odlučuje o podnesenom zahtjevu.

Član 8.

(Naknada za prekovremeni rad, rad u neradne dane, noćni rad, rad u dane sedmičnog odmora i rad u dane državnih praznika)

(1) Naknadu za prekovremeni rad, rad u neradne dane, noćni rad, rad u dane sedmičnog odmora i rad u dane državnih praznika policijski službenik ostvaruje u skladu sa članom 17. Zakona i članom 35. Kolektivnog ugovora za policijske službenike u Ministarstvu unutrašnjih poslova Zeničko-dobojskog kantona ("Sl. novine Zeničko-dobojskog kantona", broj 4/18).

(2) Rješenje o naknadi za prekovremeni rad donosi ministar na prijedlog policijskog komesara.

(3) Organizaciona jedinica je dužna u šihtnu listu upisati broj sati prekovremenog rada.

(4) Policijski komesar će donijeti instrukciju o načinu angažovanja policijskih službenika za prekovremeni rad u skladu sa članom 100. Zakona o policijskim službenicima Zeničko-dobojskog kantona-prečišćeni tekst ("Službene novine Zeničko-dobojskog kantona", broj:14/14 i 2/18).

(5) Policijski službenik čiji je raspored rada organizovan u turnusima-smjenama ostvaruje pravo na naknadu za noćni rad, rad u dane državnih praznika i rad u dane svog sedmičnog odmora na osnovu broja sati upisanih u šihtnu listu.

(6) Policijski službenik čiji rad nije organizovan u turnusima-smjenama ostvaruje pravo na naknadu za rad u neradne dane, noćni rad i rad u dane državnih praznika na osnovu broja sati upisanih u šihtnu listu.

(7) Policijski komesar će donijeti instrukciju o načinu angažovanja policijskih službenika iz stava (5) i (6) ovog člana.

Član 9.

(Naknada za privremeni interni premještaj)

(1) Policijski službenik koji je privremeno interno premješten u skladu sa članom 18. Zakona ima pravo na naknadu za troškove odvojenog života od porodice, u iznosu od 250 KM mjesečno.

(2) Policijski službenik ima pravo na naknadu za odgovarajući smještaj u iznosu od 250 KM mjesečno.

(3) Za ostvarivanje prava na naknadu iz stava (1) i (2) ovog člana policijski službenik ostvaruje podnošenjem pismenog zahtjeva i odgovarajućeg dokaza o smještaju u mjestu rada.

Član 10.

(Otpremnina u slučaju otpusta zbog viška policijskih službenika)

(1) Policijski službenik ima pravo na otpremninu u slučaju otpusta zbog viška policijskih službenika u skladu sa članom 19. Zakona.

(2) Naknadu iz stava (1) ovog člana policijski službenik ostvaruje na osnovu rješenja o otpustu zbog viška policijskih službenika, sa utvrđenim pravom na otpremninu srazmjerno godinama penzijskog staža na poslovima policijskog službenika.

Član 11.

(Naknada za troškove sahrane i za slučaj smrti)

(1) Troškove sahrane policijskog službenika koji u toku vršenja dužnosti izgubi život, snosi Ministarstvo, na osnovu pribavljene dokumentacije o troškovima iz člana 20. stav (1) tačke a), b) i c) Zakona.

(2) Troškovi iz člana 20. stav (1) tačka d) Zakona (drugi uobičajeni troškovi) isplatit će se u iznosu od jedne prosječne plaće isplaćene u Zeničko-dobojskom kantonu, prema posljednjem objavljenom statističkom podatku.

(3) Radi ostvarivanja naknade iz stava (1) i (2) ovog člana, porodica koju je preminuli policijski službenik izdržavao dostavit će Ministarstvu broj bankovnog računa na koji će se uplatiti utvrđeni iznos.

(4) Radi ostvarivanja naknade u slučaju smrti policijskog službenika izvan vršenja službene dužnosti, porodica koju je preminuli policijski službenik izdržavao dostavit će Ministarstvu zahtjev za naknadu troškova sahrane, u kojem će biti naveden broj bankovnog računa na koji će se uplatiti iznos za troškove sahrane, te smrtni list odnosno izvod iz matične knjige umrlih.

(5) Radi ostvarivanja naknade za slučaj smrti člana uže porodice, policijski službenik će uz zahtjev za naknadu za troškove sahrane člana uže porodice, priložiti original ili ovjerenu fotokopiju smrtnog lista odnosno izvod iz matične knjige umrlih.

(6) Članom uže porodice policijskog službenika, u smislu stava (5) ovog člana smatraju se:

- a) bračni i vanbračni drug ako žive u zajedničkom domaćinstvu sa policijskim službenikom,
- b) dijete (bračno, vanbračno, usvojeno, pastorče i dijete bez roditelja uzeto na izdržavanje do 18., odnosno do 26. godine života ako se nalazi na redovnom školovanju i nije u radnom odnosu, a djeca nesposobna za rad bez obzira na starosnu dob),
- c) roditelji (otac, majka, očuh, maćeha i usvojitelji),
- d) braća i sestre bez roditelja do 18., odnosno do 26. godine života ako se nalaze na redovnom školovanju i nemaju drugih prihoda, već ih policijski službenik stvarno izdržava ili je obaveza njihovog izdržavanja zakonom utvrđena, a ako su nesposobni za rad, bez obzira na dob, pod uvjetom da sa njima živi u zajedničkom domaćinstvu, i
- e) unučad ako nemaju roditelja i žive u zajedničkom domaćinstvu sa policijskim službenikom.

(7) Ukoliko u Ministarstvu rade dva ili više zaposlenika, naknada za slučaj smrti člana uže porodice isplaćuje se samo jednom zaposlenom članu porodice, prema njihovom međusobnom

dogovoru i datim pismenim izjavama, a u slučaju nepostizanja dogovora naknada se dijeli i isplaćuje u jednakim iznosima svakom zaposlenom članu porodice.

Član 12.

(Pravo na osiguranje od posljedica nesretnog slučaja)

Policijski službenik ima pravo na osiguranje od posljedica nesretnog slučaja, koje se ostvaruje na način uređen ugovorom o osiguranju od posljedica nesretnog slučaja, koji je zaključen sa osiguravajućim društvom.

Član 13.

(Naknada za prevoz na posao i sa posla)

(1) Policijskom službeniku kojem nije organizovan službeni prevoz na posao i sa posla, a čije je mjesto stanovanja udaljeno od mjesta rada najmanje 5, a najviše 120 kilometara, ima pravo na naknadu za troškove prevoza na posao i sa posla u visini cijene mjesečne karte u javnom prevozu.

(2) Pravo na naknadu iz stava (1) ovog člana policijski službenik ostvaruje podnošenjem pismenog zahtjeva u kojem navodi da svakodnevno putuje od mjesta stanovanja do mjesta rada, adresu stanovanja i vrstu prevoza koji koristi (javni prevoz ili privatni automobil).

(3) Uz zahtjev se prilaže:

- a) potvrda o prebivalištu/boravištu - obrazac PBA-3,
- b) original potvrda o visini cijene mjesečne karte javnog prevoznika čiji prevoz koristi, odnosno potvrdu o visini cijene mjesečne karte javnog prevoznika za relaciju na kojoj stvarno putuje u dolasku na posao i odlasku sa posla, ako koristi privatni automobil,
- c) ovjerenu izjavu datu pod punom krivičnom i materijalnom odgovornošću da svakodnevno putuje od mjesta stanovanja do mjesta rada i vrstu prevoza koji tom prilikom koristi.

(4) Policijski službenik je dužan odmah u slučaju nastanka neke nove činjenice koja je od uticaja na pravo na naknadu ili visinu naknade dostaviti pismenu obavijest.

(5) Svaka zloupotreba prava na naknadu za prevoz na posao i sa posla podliježe postupku utvrđivanja povrede radne dužnosti i naknade štete.

(6) Naknada iz stava (1) ovog člana isplaćuje se samo za dane provedene na radu.

Član 14.

(Naknada za ishranu tokom rada)

(1) Policijski službenik ima pravo na naknadu za ishranu u toku rada (topli obrok) samo za dane prisustva na poslu, a visinu i način ostvarivanja naknade utvrđuje svojim aktom Vlada Zeničko-dobojskog kantona (u daljem tekstu: Vlada Kantona).

(2) Pravo na naknadu iz stava (1) ovog člana ne ostvaruje se u slučaju odsustvovanja sa posla po bilo kojem osnovu (godišnji odmor, plaćeno ili neplaćeno odsustvo, službeni put, odsustvo zbog korištenja bolovanja, porodijsko odsustvo, suspenzija i sl.).

Član 15.

(Regres)

(1) Policijski službenik, ima pravo na naknadu za korištenje godišnjeg odmora (regres) u visini od 50% prosječne neto plaće isplaćene u Federaciji Bosne i Hercegovine prema posljednjem objavljenom statističkom podatku.

(2) Pravo na regres iz stava (1) ovog člana ima policijski službenik koji u toku kalendarske godine ima pravo na godišnji odmor.

Član 16.

(Otpremnina)

Prilikom odlaska u penziju policijski službenik ima pravo na otpremninu u visini svojih pet ostvarenih prosječnih neto plaća isplaćenih u prethodnih pet mjeseci.

Član 17.

(Naknada za službeni put)

Polijski službenik ima pravo na naknadu troškova službenog puta, čiju visinu i način ostvarivanja uredbom utvrđuje Vlada kantona.

Član 18.

(Naknada za odvojeni život od porodice i smještaj u mjestu rada)

(1) Polijski službenik sa dodijeljenim činom generalni inspektor policije i glavni inspektor, čije je mjesto prebivališta njegove porodice od mjesta rada udaljeno više od 70 kilometara, ima pravo na naknadu za odvojeni život od porodice i naknadu za smještaj u mjestu rada.

(2) Naknada za odvojeni život od porodice utvrđuje se u visini od 250,00 konvertibilnih maraka mjesečno.

(3) Naknada za smještaj u mjestu rada utvrđuje se u visini od 250,00 konvertibilnih maraka mjesečno.

(4) Ostali policijski službenici čije je mjesto prebivališta njihove porodice od mjesta rada udaljeno više od 70 kilometara, imaju pravo na naknadu troškova smještaja u mjestu rada u visini od 250,00 konvertibilnih maraka mjesečno.

(5) Naknada za odvojeni život od porodice isplaćuje se samo za dane provedene na radu.

(6) Za ostvarivanje prava na naknadu za smještaj u mjestu rada, policijski službenik je dužan podnijeti pismeni zahtjev i vjerodostojan dokaz o smještaju u mjestu rada.

DIO ČETVRTI - NAČIN OSTVARIVANJA DODATKA NA PLAĆU

Član 19.

(Poseban dodatak na plaću)

Poseban dodatak na plaću iz člana 10. Zakona policijski službenik ostvaruje na osnovu rješenja o pravu na poseban dodatak i iznosu tog dodatka, u skladu sa odlukom koju donosi ministar na prijedlog policijskog komesara.

Član 20.

(Dodatak za izvanredne radne rezultate)

(1) Dodatak za izvanredne radne rezultate iz člana 11. Zakona, policijski službenik ostvaruje na osnovu rješenja koje donosi ministar na obrazloženi prijedlog policijskog komesara.

(2) Rješenjem iz stava (1) ovog člana utvrdit će se iznos dodatka za izvanredne radne rezultate.

DIO PETI - PRELAZNE I ZAVRŠNE ODREDBE

Član 21.

(Ravnopravnost polova)

Odredbe ove Uredbe podjednako se odnose na osobe muškog i ženskog pola bez obzira na rod imenice koji je upotrijebljen u tekstu.

Član 22.

(Donošenje rješenja)

(1) Naknade koje su predviđene odredbama članova: 6., 7., 9., 10., 11. stav (4) i (5), 13., 16. i 18. ove Uredbe ostvaruju se donošenjem rješenja.

(2) Dodaci na plaću iz članova 19. i 20. ove Uredbe ostvaruju se donošenjem rješenja.

(3) Rješenja iz stava (1) i (2) ovog člana donosi ministar.

Član 23.

(Donošenje uputstva)

Policijski komesar će donijeti uputstva iz člana 8. stav (4) i (7) ove Uredbe u roku od 60 dana od dana stupanja na snagu ove Uredbe.

Član 24.

(Prestanak važenja ranijeg propisa)

Danom stupanja na snagu ove Uredbe prestaje da važi Uredba o plaćama, naknadama i drugim materijalnim pravima policijskih službenika Zeničko-dobojskog kantona ("Službene novine Zeničko-dobojskog kantona", broj: 3/08, 10/09, 13/09, 2/10 i 7/10, 3/12, 12/12, 14/12, 5/14, 6/14, 1/15, 3/15 i 5/15).

Član 25.

(Neriješeni zahtjevi)

Podneseni, a neriješeni zahtjevi za naknade do stupanja na snagu ove Uredbe, rješavat će se u skladu sa ovom Uredbom.

Član 26.

(Stupanje na snagu)

Ova Uredba stupa na snagu danom donošenja i objavit će se u „Službenim novinama Zeničko-dobojskog kantona“.

Broj: 02-02-11043/18.

Datum 05.07.2018. godine

Z e n i c a

PREMIJER

Miralem Galijašević

DOSTAVLJENO:

1x Ministarstvo unutrašnjih poslova,

1x Ministarstvo finansija,

1x „Službene novine Zeničko-dobojskog kantona“,

1x a/a.